

萬

曆

疏

鈔

萬曆疏鈔卷三十九

邊餉類

右 星

內帑日匱邊餉轉增乞圖清理疏

王德完

邊餉歲增乞籌畫以裕經費疏

許聞造

指陳兵餉切務以裨安攘疏

楊俊民

邊餉新增漸多太倉供億難繼疏

楊俊民

恭效愚忠披陳時政之要疏

連 標

乞勅會議宣鎮錢糧疏

萬曆疏鈔卷三十九

邊餉類

內帑日匱邊餉轉增乞勅當事諸臣共圖清理
以濟時艱疏

石

星

兵部尚書

萬曆十八年七月

竊惟國之大事在兵兵之仰給在餉餉克則兵強安
攘之績可成餉詘則兵靡侵陵之惠立至蓋嘗讀史
至漢宋之際未嘗不掩卷歎息而爲時事懼也試爲
皇上陳之漢之興也蕭何轉餉不絕韓彭因以成功

後則糧運不繼蜀將齎志而炎燼微矣宋之隆也遼
幣歲輸不乏夷夏賴以奠安後則索獻不遂金人渝
盟而宋渡南矣語曰前事之不忘後事之師也請以
近事譬焉 國家建都燕幽三面備虜九邊之費歲
逾四百餘萬兩近已窖銀懸罄年例之請逡巡而無
以應此糧運不繼之漸也虜自稱臣奉貢我開關市
以恤之雖每歲不無少費而邊境寧謐垂二十年近
已羶帳西移甘肅之掠長驅而不肯休此金人渝盟
之兆也夫以積貯窘竭如此虜人跳梁如彼行且議

增兵行且議添餉而各鎮貢市之需且移爲戰守之具矣夫戰豈易言哉越之圖吳也十年訓練而後可以卽戎項自邊柝罷警經鬪之將漸消故今優戰將之需不可不急議也項自土木歲興精銳之士殆寡故今養戰士之需不可不急議也項自駑馬入市追逐之騎浸微故今蓄戰馬之需不可不急議也三議備而後可言戰而後可言貢市之應罷與否矣是皆司馬之事敢越邊俎而談第_臣等職司兵餉日憂不足故向有博采羣議以措財用之請幸蒙 聖明俞

兄 勅下兩京九卿科道條議兩月以來固有言之者矣或言摻括未必應手恐成畫餅之談終爲無米之援納而援納未必應手恐成畫餅之談終爲無米之炊事勢至此尚可泄泄爲哉臣等反覆籌之方今之最急者莫如邊餉最耗財者亦莫如邊餉與其摻索餘貲以佐費不如汰革虛冒以足用與其差官往查以滋擾不如自行清理以省事竊見一時邊鎮督撫按臣以及司道將領部屬罔不彬彬號稱得人而又目睹夷情莫測邊費滋大深知庫藏盡空接濟爲難

必須破格一處始於時事有裨謹將應查應議事件
開具於後通行邊鎮督撫諸臣酌照邊情緩急劑量
事勢難易或漸次議處或早行完報務在聽聞不駭
而積弊消除虛冒查革而實用有濟其戰將有當優
者卽以餘餉優之其戰士有當養者卽以餘餉養之
其戰馬有當蓄者卽以餘餉蓄之凡旣備矣而後酌
以抵年例之數扣除一二本緣餉之不足故爲清餉
之舉因爲實邊之計名雖爲餉兼亦爲邊也事完造
黃冊二本一送戶科一送兵科青冊二本一送戶部

一送兵部清查得當者司道等官咨吏兵二部紀錄優叙其不然者附過劣處伏候命下移咨兵部併咨各邊鎮督撫轉行各兵備管糧官及咨都察院轉行各巡按御史仍劄各邊督餉郎中一體欽遵施行緣係內帑日匱邊餉轉增乞勅當事諸臣共圖清理以濟時艱事理未敢擅便開坐謹題請旨計開一覈軍丁照得各鎮官兵家丁在嘉靖四十五年原有定數近則所增漸多糧餉耗費合勅督撫責成司道責成將領備查各城堡墩臺原軍若干後加增若干今可

備征戰城守者若干各將官家丁原額若干後加增若干今可備衝鋒破敵者若干應存留者若干其有虛數無人應當者盡行查除老弱不堪者或議量革或有缺不補仍將軍丁著爲定額無故不許復增至於薊鎮南兵原餉太厚亦當照例查處其查出錢糧管糧郎中貯庫內有技藝超衆勇力絕倫者即將前銀處給雙糧肉菜以示優厚伏乞 聖裁一汰駑馬照得兵家長技莫利乘馬故馬兵一可當步兵十然知馬之利而不究馬之害有馬之名而無馬之實則

馬雖多亦奚以爲也我國家之與夷虜市也不過藉馬以羈縻之其實堪用之馬百無一二除老損不堪者給軍變賣以充市本無容別議間有幼小者給軍牧養此之爲害不惟累在貧軍而且移之國計矣軍士赴市領馬有守候之苦領馬到手有飼養之苦一經倒損有陪累之苦及養成給軍又有支草料之苦故以今日之馬數較嘉靖四十五年原定之馬數除陝西各鎮半係茶易牧養且增數不多免議揀汰外查得薊遼二鎮所增已多而宜鎮比舊額多一萬二

千餘匹大同多二萬九百餘匹山西多九千餘匹以
一馬計歲支銀七兩以一歲多銀幾三十萬兩以宣
大山西併陝西薊遼奚膏四十萬餘兩錢糧安得而
不耗費國計安得而不空乏也且使收馬堪用猶可
言也然而堪備征戰者又百無一二乎合勅督撫嚴
行司道等官將臆壯大馬查照原額揀驗存留其駑
馬盡數汰除如不足原額卽以駑馬變價另買臆壯
者以充其數以後互市夷馬其不堪者照依原題估
價變賣無得仍前給養以滋糜費如此則軍可蘓息

馬皆實用歲省銀四十萬餘兩邊儲內帑均可備緩
急之用矣伏乞 聖裁一增引價照得鹽法設號曰
飛輓蓋因天地自然之利而爲通商裕國之資法至
善也有等奸徒因見中鹽利厚投托勢要營求書札
朝持片紙暮享千金是以朝廷實邊之需而徒爲豪
猾漁獵之媒耳臣等以爲欲杜請託之門當先增鹽
引之價除山東鹽引照舊不加又除宣大山西近日
已增八分減一之數不必再加外合無移咨督撫及
劄行各鎮管糧郎中已後淮浙河東及長蘆鹽引每

引各量加銀一錢照依時估斗頭酌量城堡衝緩中
納臣非不體察人情故爲苛刻查得萬曆十二年遠
商韓繼魯等告准蘆鹽每引二錢願納四錢後因薊
永通融俱納三錢近五月間本部有存積兩淮鹽引
據商人通狀山東司郎中郭甲查審每淮鹽一引伍
錢願納銀六錢均一蘆鹽也遠商二錢土商何爲上
納二錢均一淮鹽也存積者旣願納六錢見中者猶
可止納五錢乎且所增引價雖出本商其實與買求
奸商引目價實相當况鹽價旣增書札白少事完各

鎮查原額鹽引若干加增過銀若干造冊送部抵充
年例銀兩之數伏乞 聖裁一查虛冒照得軍士逃
故馬匹倒死糧料住支還官此定例也但有不肖將
官不行開報一經染指羣小垂涎其弊有不可勝言
者如原任宣大總督鄭洛悉心經理遂省銀一十二
萬兩聞宣鎮兵備陳于階每一季查出虛冒銀二千
餘兩解部作正支銷舉一道而全鎮可知矣舉全鎮
而九邊又可知矣又查得遼東廣寧壯士八十名先
年僉派免差馬皆自餒今亦俱支料草而前鋒哨探

營併降夷接濟馬應支四錢五分者今一槩支六錢五分合勅督撫嚴督司道等官備行查核如有逃故倒損者將官實報司道司道實報郎中各郎中每季將開除逃故軍士若干倒死馬匹若干及遠鎮減過多支料草馬匹若干俱令從實報部果有虛冒司道指實具呈撫按應叅奏者叅奏應拏問者拏問各郎中有明知虛冒不行舉發者本部訪聞定行叅劾伏乞聖裁一停工作照得邊牆以限內外城堡以便居守國家屏翰胡可忽也但邇來欸貢幾二十年修

造漸有成績矣。值此虜情叵測之時，正當養威蓄銳之日。況有營繕則用軍，夫用軍夫則有糧餉。若費用浩大，糧餉匱竭，兵馬猝臨，何以應之。合勅督撫衙門查議一應邊城堡座，急當修者仍舊議修，應稍緩者量行停止。其客兵本色錢糧堆積緊要城堡，如有聲息聽候關支內有浥爛不堪者，抵放軍糧，扣下折色，另買新糧抵補伏乞 聖裁。

國計日詘邊餉歲增懇乞籌畫以裕經費疏

王德完

戶科都給事中
萬曆二十一年正月

臣惟軍國之務稱重大者惟邊餉而軍國之需稱浩繁者亦惟邊餉方今邊餉匱詘極矣在鎮臣按額而呼尤有額外之呼在計臣按時而應尤有不時之應呼者至急應者至艱呼者愈頻應者愈窘何內外相違若是豈祖宗朝固已然耶臣考開國之初及嘉靖之季其所爲輕制繁簡有若天淵迥絕者國朝自洪永以來原無年例年例自正統始薊保密昌原不

稱邊稱邊自嘉靖始臣請縷析言之宣府歲額不過五萬兩今主客餉銀不下二十九萬有奇大同原額亦止五萬兩今不下四十五萬有奇山西原額不過二萬兩今不下二十萬六千有奇遼初不過一萬兩嘉靖時增至二十萬三千今不下六十萬有奇薊鎮初不過一萬五千兩嘉靖時增至七十三萬今不下一百二十四萬有奇延綏初不過一十萬兩嘉靖時增至二十一萬今不下三十六萬有奇其在甘固等鎮或增八九萬四五萬此眇少者也總計弘正間各

邊年例大約四十三萬而止在嘉靖則二百七十餘
萬業已七倍至今日則三百八十餘萬且十倍之竭
九州之財力而不足以供括百年之蓄藏而難乎其
繼撫今追昔能不寒心然臣伏而思之我祖宗朝
土田賦稅非有加於今也乃事不煩而自足今甲兵
戰馬大不逮於昔矣乃例歲加而難支其故何也蓋
祖宗朝寓兵於屯且耕且守有備無患此趙克國金
城之遺蹟也自屯田之法堙則經界隱沒而難明屯
丁消索而賠苦人皆逋逃地爲陷穽戎馬財賦遂分

兩塗。祖宗朝中鹽於邊納粟於倉有飛輓之利而無轉輸之勞此晁錯實憲之遺意也自銀之一出則金錢盡入於太倉枵腹咸仰於內帑脂膏益竭芻粟愈難米珠草桂可爲扼腕數十年來謀臣策士蒿目嘔心思復屯鹽之舊者至諄切矣然蓁莽之區竟無畔岸開荒之報多是虛文逐末之輩率憚耕耘開墾之譚卒成畫餅生財有道舍此何由將裁冗費以濟時艱則十九年之汰革方行而二十年之恩綸已降近檢督撫諸奏薊鎮議裁四萬二千旋增五萬七千

矣山西裁三千四百旋增二千六百矣宣府裁二萬
八千旋增四萬五千矣大同裁二萬一千五百旋增
二萬三千八百矣卽數鎮而他鎮何推也將事揆括
以補決裂則三秦兩浙閩海滇池處處議留紛紛請
發卽如數日章奏延綏請補年餉五萬九千矣兩廣
請留存貯一十五萬矣應天請留潞墅關稅及奉例
三萬三千矣鳳陽請歲發兵餉四萬七千矣卽數省
而他省可知也減者幾何增者未已欲與不可欲取
不能展轉思維束手無策惟有節儉一語可爲救時

急務耳蓋以利言則外甚微而內甚鉅以蠹言則外
易別而內難祛一有請乞卽係數百金偶有乾沒動
關數十萬自非宸衷天啓真見歲餉之艱難憂深國
計之困促則城社可憑齒馬有忌誰能洗百年之積
蠹而一清之昔漢文帝惜露臺百金之費而海內富
庶豈百金富漢室而其樽節者皆百金類也唐玄宗
侈瓊林大盈之積而海內虛耗豈瓊林能耗唐家而
其窮奢者皆瓊林數也臣願皇上以漢文爲法以
唐玄爲鑒留神廵畫隨事稽查如其爲急缺之用應

儲某爲不急之務應汰某爲額外之徵應省某爲格外之求應免某爲有益之物應貢某爲無益之玩應蠲某爲先朝之舊應遵某爲末世之實應塞觸類引伸漸次省減而又屯田鹽法注意責成選賢任能共圖幹濟有可耕之地則勿以煩苛奪之有可耕之人則勿以科歛驅之減斗頭以溥皇仁懲侵尅以恤民隱苟可墾田積粟何問內外兩商儻能薄賦輕徭不徇新舊二額隴畝有勸相之方無徒道委之府府委之衛鷄犬絕追呼之擾以使近者皆悅遠者皆來一

切阜財通商容民畜衆諸良法務與督撫諸臣實心
振舉則以萬壑爲阡陌以大冶爲鑪錘元氣不洩於
鍼鉞泉源不涸於尾閭行觀上下俱足邊腹咸充不
憂帑竭藏空庶可久安長治軍國幸甚臣愚幸甚

目擊時艱指陳兵餉切務以裨安攘疏

許聞造

貴州道監察御史
萬曆二十二年四月

竊謂天下未嘗無不測之變有備則變可因備而消
無備則變將乘虛而起書曰惟事事乃其有備有備
無患切惟方今事勢有大憂者二有大計者六備則
治安不備則衰亂相去甚遠臣父給事中相卿嘗語

曰中國文明大地每值歲之丙午則火盛極而變
往往多事臣稽往牒無歲不驗今距丙午雖若尚遠

然火德漸盛先事當圖玩愒偷安十年瞬息所以盡

人事而孚天時者正今日事也況東征之役將吏損傷士馬物故始以救人而出卒以畏人而歸示人以兵餉兩虛之形自露其知勇俱困之狀束手無策坐食朝鮮邨小之仁不終啓疆之思益熾臣謂此一舉也隳西夏之成積張日本之雄心啓字國之異圖兆諸夷之窺伺生內地之邪謀國家深憂隱禍將伏於叛卒遠夷之外矣孔子曰人無遠慮必有近憂如其苟且支吾爲猷不違今年虜犯以貢市紓目前之虜明年倭犯以封貢解目前之倭賞罰無紀簡練無素

逾時閱歲人不知兵萬一有不求互市不貪封貢者
突發大難誰當其辜或曰方今條陳累牘羣議盈庭
要言不繁空談何補臣謂不然書曰庶言同則繹言
之而不繹者有矣未有不言而能繹者也臣言官也

知之而不言不忠言之而不盡亦不忠以臣之言盡

臣之意願 陛下勿罪臣言爲迂勿厭臣言爲套勅

下戶兵二部憐臣朴忠繹臣未議條圖詳覆俾臣言

獲附千慮之得 陛下媿美於芻蕘之詢臣愚幸甚

何謂大憂一曰武備空虛唐有天下三百年兵制凡

三變云非好變也物弊極則變變久而復弊弊又極而不復變則遂至大壞而不振以京軍言之京師宿重兵約三十餘萬人歲支口糧九十八萬八千餘石軍不爲不夥矣費不爲不重矣強幹弱枝之道當如是也天順兵部尚書于謙選得勝兵十五萬人踰二十年僅選得勝兵八萬人迨正德中選用勝兵二三十萬人而不足矣今不知又當何如矣以外衛言之臣前任直隸山東各衛所官軍多寡不同較之原額率耗大半且營盤盡廢散伍各屯近者數十里遠者數

百里安土懷鄉罕至城廓暫赴操點露處羣居放歇
稍遲輒肆誹詬囂然有疾視脫巾之狀矣夫城以衛
民軍以捍城帝王宸居金城千雉而強兵不及二三
萬京師不幾虛無人哉雖京師權貴所萃動多掣肘
然 聖明立漸嚴勅京營立法簡稽亦何難於餉節
強兵雖外軍離析多年未易收拾然督撫道抽丁入
城亦漸可以招徠守禦往年有彰義門之虜有東市
之曹賊直隸山東有劉六劉七之變天下豈能常無
事而可坐視極弊漫不措意乎二曰漕糧偏重胡元

都燕據西北之上游資東南之供億非其財不膽也
非其餉不充也當其時方國珍據明越張士誠據姑
蘇東南運道不通京師米價騰踴由是我 聖祖起
和滁夷申君通沙漠而元社遂屋焉今日之形勝非
卽故元之形勝乎而今日之仰給東南尤非直故元
之仰給東南也元人海運漂沒常多一舟所失不下
千餘石人夫從溺不下百餘人歲以數十百人之生
死與漕數較多寡而以爲便憂人之君相不忍言之
矣夫禹貢刊滌功止達河五服要荒惟薄海則海固

聖帝明王所不能用也我成祖文皇帝定鼎以來

鑿渠轉漕歲輸江南四百萬石於京師向蒙黎庭之績捷伐之威內讐奸萌外銷寇孽三百餘年間莫淫心穢志以干三尺者乃近事可慮焉

臣任東昌時東

昌士民爲

臣

言萬曆十三年反者郭大通密造逆謀

勾連賊黨圖劫糧運計捨臨清雖賴陛下聖神威

武隨手殄滅然端倪已兆先事宜防蓋自徐州入關

至臨清達河計漕廣不能尋遠且六七百里涓涓一

絲僅若衣帶封以丸泥千艘立阻勝國前車可爲殷

鑿也臣愚謂燕秦不責餉於荆吳齊魯豈借資乎
越食土之毛各因其產請得量加本色於江北議增
折色於江南山東由漕河南入汴避黃淮之險防梗
塞之虞少減蜚輓之勞兼節轉輸之費南阻則北運
可通北款則南漕足恃因時勢酌盈虛增損推移經
收消息卽丘文莊濬所謂彼不來而此來之說也事
變之來曷其有極疇能逆覩者乎此臣愚所以通其
說於海運之外也何謂大計一曰清餉額今天下衛
所設有額官額軍卽派有額糧額俸或貯定倉廩或

存留州影 祖宗以來未之有改也二百年來官軍

皆舊額乎俸糧常減派乎臣海鹽人也海寧一衛七

所除職員外原額正軍八千八百名年派口糧八萬

八千餘石而官俸不與焉今衛所實在正軍止三千

名比之原額已缺五千人矣臣任東昌府推官平東

臨清三衛約正軍一萬八千餘名該口糧一十八萬

餘石而官俸不與焉今三衛實在正軍八千七百九

十四名比之原額幾缺萬人矣卽兩地推之天下可

知也軍虧大半餉取常盈不聞減派以寬民不聞扣

存以足國糧果安在乎衛官之虛領無稽奸書之對
支罔忌愈久愈蔽莫能釐革扼腕痛心孰甚於此盍
行各該巡按御史叅錯委官吊取天下衛所官旗軍
人差操故絕逃亡勾補之積前後彼此以合原額之
數逐一清查扣留積貯天下之大不可勝算矣二曰
數屯田國初設立衛所聯之以官旗比之以什伍每
月糧以足其養又屯地以卹其私俾人有懷土之情
而無逃亡之患猝有緩急庶幾需一日之用法至善
也夫何惠墜而不知恩裁以而人忘所自肥饒相

易質佃相消事更百年人更數世布政司表裏都司而籍不存都司綱維衛所而籍不存各稽查各所而籍不存夫所查者屯也所據者籍也籍之不存查將安據臣前任東昌府推官撫臣委臣清查竊常蒿目深思而粗得其梗槩焉經界正而失額可復矣稅額定而更變可杜矣冊籍清而侵占亦可無慮矣當時規地爲屯南北東西各有界限軍屯繡錯於民地之中者固少而民地牙制於軍屯之內者絕無百戶不知屯頭必知之屯頭不知鄉耆必知之經界既正縷

析條分業主不同軍民咸集孰爲民地孰爲軍地孰爲子粒地給小票以填四至合衆票以圖魚鱗其中卽有軍賣民地民占軍屯者但能襍耕於本屯之中而亦豈能竊出於軍地之外哉總圖旣完覈實清丈而屯猶矢額者無是理也但各處地上肥瘠不同子粒輕重互異竊謂則壤起科一准諸民豐凶徵免一視諸齊民造冊稽查一倣之黃冊至山陵諸邊凡立衛開屯之處因地土之宜順人情之便剔索如弊設立規條盡數清查務及原額責成府縣徵解如期一

體老成無容怠玩庶衛所聞之風清弊絕而以軍衛
之儲胥裨召募之兵餉不惟大有補於軍興亦可少
紓夫民力矣三曰權馬價天下之利害其大較可籌
也利於國不利於民憂國者爲之利於民弗利於國
憂民者亦爲之適若國利民亦利憂國憂民者所宜
亟講而力行之也馬政之弊姑未暇論一馬俵解民
間之費無慮三四十金逮給領貧軍居無廐棧餉乏
芻蕘啖之粗醜氣味惡烈強壯之馬不數月而旋已
骨立矣以之衝突則羸劣而不前以之走逝且欸段

而不進故有馬誠不如無馬之便於軍徵馬固不若徵銀之利於國也直隸河南山東歲計解馬二萬匹議令一年全徵一年折半應折之歲計馬一萬匹合之可歲得銀三十五萬兩則茲十年折馬五萬間閭寡傾家之累府庫有積羨之饒而營伍亦無所損益於有餘不足之數仍候國家富足照舊全徵豈非理財之一端權宜之要術歟四曰濬溝洫國家賦財動稱三吳豈非以宜稅稻善蠶績擅魚鹽之利哉戶兩任北地詳觀土宜西北之美利多三吳所無而三吳

之所恃爲富饒者則西北所素具而不必仰藉者也
黍稷種稜桑麻菽麥與夫梨棗菓蔬瓜瓠木綿之屬
鬱鬱充充千里盈望而齊之統魯之縞天津登萊之
魚鹽又何嘗不兼三吳之利哉夫何畝澮不修蓄洩
無制一遇淫潦傾同汪洋蒼生溺於洪濤閭閻蕩成
巨浸損瘠滿路拯救無策臣五載災潦三年揆厥所
由其咎安在蓋直隸之遠濡漳易山東之洸沂汶泗
皆以承受畎畝之餘水轉輸漕衛之經流當時列國
所由稱富強成伯業者初不易地而殊民也今田間

無溝澮之流古河成耕牧之區上流雖有減水之名
下流曾無容受之處或起科於氓庶或承佃於縉紳
田地河渠隔絕不貫每年泰山狙獾新水驟發潰決
城廓漂沒廬舍遂致中原方四五千里之地一望無
際寸草不生皆溝澮不修之故今欲修溝澮之政非
遽能一一如古也但合數百畝之田必有溝合數十
溝之水必有川合數大川之水必就窪而爲湖洼以
達於河以會於海因地之勢自高而下自近而遠自
小而太寧棄不毫毋爭尺寸期於無令壅滯也其法

令民貧而饑者計粟受役罪應贖者計錢受役犯應
戍者以歲月功程受役吏稱職者得陞藩臬京堂總
其事毋欲速期於三年毋玩弛期於奏績斯則以賑
濟之倉穀修農功以一方之贖緩興民利水何所不
治田何所不墾是一舉而興天下之大利平天下之
大患西北之饒將不必顛顛仰給於東南而大禹平
成永賴之功將復見於 陛下矣五曰定軍制國初
軍民分藉民力農以養軍軍戍守以衛民 太祖嘗
曰吾欲養兵百萬不費百姓一粒米蓋期廣開軍屯

重寬民餉意甚厚其後屯田歲久漸廢尺籍亦日久
漸消景泰初年令府州縣召募民壯所在官司率領
團操有警調發此用兵之始也弘治中行伍太虛文
制州縣七八百里僉民壯五名五百里四名百里及
不能百里二名遇有警急官給行糧調發嘉靖三十
五年每縣設勇士多寡有差每名工食銀七兩二錢
大縣至累一二千金有餘後天下益多故財耗兵脆
衛所既徒靡餉兵快復成虛文每腹裏盜發力不能
禦輒調土漢狼達兵又難駕御迺川廣雲貴羈糜州

司道里遠遠夷性獷戾遠不及事橫不可制故有盜
來放火軍來殺乘之誼夫 祖宗本欲衛所力屯以
衛民既乃閭閻自養以衛軍又繼乃召夷兵以戍民
而國初額設京邊之儲與歷年所增之餉相因而不
革嗟乎民亦何辜力耕以養軍而又代之死耶夫軍
兵之不復用也則起於法之必行也祖制殺軍五名
將以失伍受誅故將畏誅而軍兵不復用民兵之不
可用也則起於法之不必行也近弊殺民兵如丘陵
將得掩匿不報故紀律不嚴而民兵不可用舍衛所

之卒與民快機壯而以土達狼兵猶之以烏喙充飽
也是驅民以從盜也必不可也臣愚竊計衛所官軍

國家豢養二百餘年以需一日之用者也胡可盡廢
也每衛額軍約五千六百人卽除逃故盡汰老弱盡
免清勾悉索精悍正軍餘丁豈無一二十人可充訓
練者乎厚其糧餉畧做募兵一按籍而軍兵可呼吸
立於麾下矣民間驍勇相沿召募而王文成守仁提
督南贛亦嘗藉其一臂之用胡可以不募也宜酌量
召募選將團操其名籍工食產祿州縣而保以戶長

聯以十牌使彼奮然常有陷陣立功誇侘鄉里之心
而又恐然常有私收連坐不敢爲非之念又團操中
之罷弱者汰歸州縣中之精悍者選補以實行陣卽
幸值太寧銷兵解甲工食旣在原額勇壯又不失原
操人歸州邑潛消而陰制之當無復有羣居不逞之
患矣六曰嚴軍法嘗聞有功不賞有罪不刑雖堯舜
不能以爲治信哉斯言而於兵制尤嚴乎哉先是虜
寇遼東都指揮禦戰不力又匿不以聞上怒立誅之
榜天下鎮守衛所等官欺弊不忠罪視此正統初都

御史羅亨信遠邊禦虜都督蔣貴都指揮安敬擁兵不進亨信露章初奏命兵部尚書王驥出行邊驥馳至軍門大軍遇虜於魚海先退者爲誰衆咸叩首曰指揮安敬命拽出立斬以徇曰自今遇敵畏縮前却者視此於是都指揮衛榮遇虜於莊浪擊破之明年都督蔣貴遇虜於石門城兒又破之隨襲虜巢於狼山夾擊又大破之蓋先朝敗軍法重邊臣知畏而地方少事今失事機而將晏然不罪擁毛揮麤自若也先朝軍機法重故邊將不敢欺惑欺蔽者死今任情

規避掩敗冒功自若也死者含冤而不蒙收恤生者憤薄而無所控訴甚者殺掠數萬陷沒連城而反得冒功陞叙豈不重傷天地之和深遺醜虜之笑哉伏乞皇上勅下部院會議賞罰定規開坐科條設立軍政一洗拘攣之弊夫衛兵民兵一也殺祖軍者烏可輕坐失機殺募兵者烏可一切弗論必無論衛所無論召募查勘功次有獲無損者爲上功獲多損少者爲次功獲損相抵損多獲少者贖罪首鼠全部全伍敗衄者論斬如是則功罪旣別不致混淆衛卒民

兵相兼竝用而衛所不爲虛設矣軍旅雖稱首汲而論理實難憑據兩軍相薄生死須臾手眼縱橫何暇取級手旣取級何暇禦人故取級者必不殺賊殺賊者固未有暇於取級者也况爭級則蹂踐而易敗論敗則掩冒而易欺今後戰勝止憑督撫監軍查審衆証某人設策某隊先鋒某軍摧堅某將陷陣某卒陣亡卽時錄叙又如某人誤事某隊遷延某軍回頭某將退縮卽時重處庶誅賞明信亦如先朝而掃穴犁庭之績將復見於今日矣臣言八事臣旨二端曰餉

與兵而已。今國勢危迫而司馬不言兵，國用空虛而司農不言餉，何等責任可以安居，何等艱危可以坐視？臣謂陛下卽憂勞宵旰，二三大臣吐握延訪，尙恐禍速備遲，緩不及事而尙泄泄悠悠，無恙於恤國步至此。臣實痛心。臣仰望施行言詞繁復，不識忌諱，干冒天威。臣無任隕越惶懼之至。

邊餉漸增供億難繼懇乞聖明酌議長策以圖

萬世治安疏

楊俊民

戶部尚書
萬曆二十二年六月

山東清吏司案呈奉本部送戶科抄出總督倉場都察院右都御史兼戶部右侍郎褚鈇題稱臣以愚劣

誤蒙任使業已踰年見去歲太倉收過各項銀四百七十二萬三千兩有奇放過各項銀三百九十九萬九千七百兩有奇而邊餉十居其八且多額外之需臣不勝私憂過計謹卽太倉考所載先年邊餉及去

年所發數目一一較量爲 皇上陳之夫邊防非今

日始也今之北虜卽昔之北虜也今之倭奴卽昔之倭奴也在西北設在沿邊衛所以防虜患在東南設有沿海衛所以防倭患自 祖宗時而已然矣然有

額衛則有額兵有額兵則有額餉總承平日久額兵不無消耗而額餉固自在也當事者誠加意清勾補足額兵給以額餉自足禦患縱地方武備單弱然就近調集亦足以捍外衛內又安可輕易增兵而難太倉以額外供哉臣考嘉靖以前九邊年例銀止一百

萬有奇而隆慶初年遂至二百八十餘萬矣今查去年所發數至三百四十三萬比隆慶間又增六十餘萬矣如薊鎮舊止六萬七千有零今至三十八萬九千餘兩密雲舊止一萬五千有零今至三十九萬四千餘兩永平舊止二萬九千有零今至二十四萬六千餘兩宣府舊止五萬一千近至三十三萬三千餘兩大同舊止五萬近至四十二萬四十餘兩山西舊止三十一萬近止二十一萬三千餘兩延綏舊止十萬近至三十六萬七千餘兩其他數未相遠姑置不

論然隆慶以前北虜屢犯客兵不時調遣其費猶可言也萬曆以後北虜款貢客兵未嘗調遣其費則可省也然使九邊各守舊額不再增兵增餉臣亦可以無言今查永平一鎮又增海防兵三千歲增餉五萬四千矣天津一處又增海防兵三千力士五百歲增餉六萬矣而又調遣浙直南兵歲費月餉行糧二十餘萬矣夫國家財賦止有此數連年水旱災傷又不能盡完自臣受事以來再三議處催科可謂不遺餘力而一歲所入僅供一歲之出今春夏不及五月而

買辦年例等項共出銀一百七十餘萬兩不足又借
京糧庫料草銀湊數幸有此可以那借設無何以應
之哉夫國家有事欲攘外安內何可無兵欲士飽馬
騰何可無餉果無兵無餉亦不得不增今查永平一
鎮見在官軍三萬三千九百一十一員名比原額已
增一萬一千六百四員名矣近年京運二十四萬六
千八十五兩比原額幾十倍矣萬曆三年又增銀八
萬四千有餘尚可謂無兵無餉乎又查天津三衛原
有官兵九千三百九十九員名爲備倭而設後因各

兵坐糜糧餉遂擇精兵壯五千七百有奇令兩遊擊
統領赴薊鎮修守今一聞倭警遽添兵添餉不知國
初設衛之本意平日訓練之謂何先該保定巡撫劉
東星題議河間河大瀋陽天津春秋五營班軍俱留
天津防海免令赴邊修築此最計之得者縱一時有
事然該鎮所轄尚有兵馬十營除留老弱護守地池
選其精銳每營可得一千五百餘名十營可得萬五
千人若有警不數日可以調集誠如是則倭奴固不
足患矣况長蘆有割皮鹽銀歲留一二萬即可濟用

是二鎮非無兵也特一調度耳非無餉也特一轉移耳然臣猶有說焉蓋兵不可輕募已募則不能遽散餉不可輕加已加則不能復減然有糜費影射可省可減而各軍無詞者夫軍有月糧不可減矣而中有逃故月糧不可住支乎馬有料草不可減矣而內有倒死料草不可扣除乎將領既多朦朧該道又不查點惟巡按閱操始僱覓應點事已則虛冒如故兵有定額官有常祿而廩給紙劄心紅油燭與贓畫書記之類則無定制將領利其折乾而多開該道重其體

面而容隱雖督撫明知亦多姑息此弊所從來遠矣
其財安得而不耗乎誠一着實清查每年可省銀七
十餘萬試舉一二例之如宣府原額京運三十三萬
三千二百有零去年止發餉銀一十四萬八千比舊
額省銀一十八萬五千二百餘兩此固因北虜款貢
故年例節省過多而督撫司道稽查節省亦與有力
焉又如總理寧武糧儲郎中劉允管糧三年積出附
餘還官冒濫屯鹽逋欠之類通二十餘萬前歲寧夏
之變當事者欲加餉以安軍心獨本官與呂巡撫堅

意不從因與當事者相左故告病而去夫方今天下
多事財賦稱訕矣使九邊督撫管糧皆若此則一年
豈止數十萬之積卽二鎮而天下可知已然天下豈
無賢者向上人孰無心惟鼓舞無術則人多因循合
無通行各邊以後督撫管糧如有潔已奉公實心任
事積貯有餘年例多減者或賜勅旌異或破格優叙
則轉移化導之機一風示間而所得居多矣每年終
各邊管糧郎中仍將兵馬錢糧開立管收除在備造
簡明揭帖送臣查考然各鎮豈盡無所出哉今查每

年遼東有本色屯糧二十七萬九千二百餘石折色
民運鹽引等銀一十九萬九千三百餘兩薊鎮有本
色屯糧漕糧九萬三百餘石折色民運鹽引等銀五
萬六千五百餘兩密雲有本色屯糧料并漕糧一十
六萬八千一百餘石折色民運等銀一十四萬四千
九百餘兩永平有本色屯糧民運糧料六萬一千五
百餘石折色糧銀五萬一千四百餘兩昌平有本色
漕糧三萬九千二百餘石折色屯糧民運等銀一十
三萬九千三百餘兩易州鎮有本色屯糧三萬三千

餘石折色民運等銀三十萬六千九百餘兩宣府有
本色屯糧一十八萬八千一百餘石折色民運馬草
鹽鈔等銀七十八萬七千二百餘兩大同有本色屯
糧民運糧料七萬八千一百餘石折色屯糧秋青民
運等銀四十八萬九千五百餘兩山西有本色屯糧
民運米豆五萬一百餘石折色屯糧民運鹽課等銀
四十九萬三百餘兩寧夏有本色屯糧民運米豆一
十六萬六千餘兩折色民運鹽引等銀一十九萬一
千六百餘兩延綏有本色屯糧民運糧料一十五萬

六千三百餘石折色鹽引等銀二十九萬四千八百
餘兩固原有本色屯糧民運糧料二十六萬七千七
百餘石折色地租鹽引等銀三十萬一千六百餘兩
甘肅有本色糧料二十三萬二千四百餘石折色民
運鹽引等銀三十九萬九千三百餘兩天津有本色
屯糧料并漕糧八萬二千一百餘石折色民運屯田
等銀七千二百餘兩是各邊未嘗無所處也顧屯糧
未能盡完民運率多拖欠故不得不仰藉京運耳然
軍民皆食土之毛而邊餉乃用不可缺誠責成各該

司道督率軍衛有司則屯糧民運未有不完者屯糧民運既完則各邊用自饒裕而京運漸不可省乎臣

考國初鹽引中納本色故各商墾田邊塞屯田鹽法二者相爲表裏最爲足國安邊要務今鹽政雖不可復而屯政則宜修舉臣嘗作縣詣天津矣見天津沿

海一帶皆可耕之地長蘆葦一望無際若能修舉屯政實爲國家永利又嘗巡茶至西寧矣見漢將趙克國一時屯田湟中民到於今受賜今邊道師師濟濟豈盡出克國下哉誠一修舉而邊方永賴之矣姑舉

二處而天下又可推矣。臣目擊九邊糜費太倉勢不能支故將各鎮兵馬錢糧新舊數目逐一開陳附以愚見伏乞勅下戶兵二部覆議上請稍加裁節通行九邊督撫趁時平寧共圖節縮務使三年之間有一年之積將來庶可支持不然平居無事尚憂不給設有意外之變何以應之此不可不亟議而早圖之也

等因奉 聖旨覽奏有禪國計屯糧民運係邊儲正供若年例增發始自嘉靖末年今又額外日添勢何能給所據各鎮虛費數多着通行各該督撫官清查

裁省及時修舉安邊足用常策勿循故套苟且目前
管糧郎中每年將該鎮兵馬錢糧實數開報總督倉
場衙門稽考其部臣及司道官果能實心節省節貯
者不次超擢以示旌異該部再斟酌詳議來說欽此
欽遵抄出到部送司案查萬曆十八年該部尚書石
星議因太倉匱乏通行各邊督撫衙門酌議節省陸
續奏報大槩所省不多旋即增添較前時尤甚原與
太倉考內數不同今該前因案呈到部看得總督倉
場都御史楮鈇題稱邊餉新增漸多太倉供億難繼

要前河間河大瀋陽天津春秋五營班軍照先該保定巡撫劉東星題議俱留天津防海免令赴邊修築及議留長蘆割沒鹽銀一二萬即可濟用又稱扣除逃故倒死軍馬月糧料草及將領家丁隨營馬匹親軍薪水廩給紙劄心紅油燭與贖書書記虛冒折乾着實清查每年可省銀七十餘萬又稱通行各邊以後督撫管糧官有實心任事積貯有餘年例多減者或賜勅旌異或破格優叙每年終各邊管糧郎中仍將兵馬錢糧備造簡明揭帖送查又稱遼東等鎮屯

糧未能盡完民運率多拖欠責成各該司道督率軍
衛有司如數追完則京運漸省又稱各商墾田邊塞
屯田鹽法相爲表裏今鹽政雖不可復屯政則宜修
舉見天津沿海一帶多可耕之地及巡茶至西寧見
漢將趙克國屯田湟中民到於今受賜今邊道濟濟
誠一修舉邊方永賴乞要通行各邊督撫共圖節縮
并欸開邊鎮錢糧應停應減各一節爲照各邊鎮向
來增兵因而增餉不無過濫委當裁省督臣褚鈇題
議前因大率爲太倉積貯空虛共圖節縮至意但查

各項錢糧應減應留事在閩外本部遞難遙斷相應酌請恭候命下本部移咨各邊督撫官及割管糧衙門轉行各該守巡兵備從長查議河間河大瀋陽天津五營班軍應否照撫臣劉東星所議俱留天津防海免令赴邊修築其應用糧餉自有本等行月二糧相應照常支給所議長蘆割沒鹽銀係解京濟邊正供擅難別議至如逃故官軍倒死馬匹月糧料草向據管糧衙門按月呈報作正支銷近來有無冒破將領家丁隨營馬匹親軍薪水廩給紙劄心紅油燭與

贖畫書記等項逐一着實清查不許虛冒折乾通融
裒益每年可省若干以後督撫并管糧官有能實心
任事存積有餘藉以減年例者本部奏請旌異或破
格優擢各年終各邊管糧郎中仍將用過兵馬錢糧
備造簡明揭帖一送本部一送太倉總督查考其遼
東薊鎮密雲永平昌平易州宣府大同山西寧夏延
綏甘肅天津等鎮屯糧民運原係濟邊正額如有拖
欠責成各該司道督率軍衛有司官照數完追至於
天津沿海一帶及沿邊荒屯田地履畝踏勘委有若

干無拘軍民聽其開墾成熟三年以後方與起科每
年終將墾過數目造冊報部期臻實效并將後開應
停應減軍馬錢糧查照欵目酌議停妥星火回奏前
來以便另行覆請本部仍咨兵部知會緣係邊餉漸
增供億難繼懇乞 聖明酌議長策以圖萬世治安
及奉欽依覽奏有禪國計屯糧民運係邊儲正供若
年例增發始自嘉靖末年今又額外日添勢何能給
所據各鎮虛費數多著通行各該督撫官清查裁省
及時修舉安邊足用長策勿循故套苟且目前管糧

郎中每年將該鎮兵馬錢糧實數開報總督倉場衙門稽查其部臣及司道官果能實心節省積貯者不次超擢以示旌異該部再斟酌詳議來說事理未敢擅便謹題請旨計開遼東鎮主兵官軍八萬三千三百二十四員名馬羸四萬一千八百三十四匹頭京運主兵年例銀一十六萬七千九百六十七兩五錢二分八釐二毫五絲客兵調遣不常無定數京運客兵年例銀八萬二百八十八兩四錢防修邊工行糧銀一萬八千兩前件臣查得該鎮主眷年例舊額二十

六萬六千二百有奇萬曆六年新添家丁賞賜并墩
軍夜不收月糧布花等銀四萬五千七十八兩八錢
四分今查萬曆二十一年發過年例并征倭銀七十
三萬八千四百餘兩比舊多賞銀四十二萬七千一
百餘兩然在征倭銀四十二萬事寧可止新添銀四
萬五千有餘久則難繼况該鎮未見增兵而驟添月
糧料草似涉虛費相應從長計議將六年新增酌量
裁減前件臣等看得遼東鎮主客兵馬年例錢糧嘉
隆以來漸次增加每歲除閏共該額銀六十萬七千

七百一十八兩有奇遇閏加銀二萬六千兩原與太倉考所載數目不同除征倭銀兩事寧停止外其新增家丁賞賜并墩軍夜不收月糧布花等銀四萬五千有奇原係先督撫陸續新添議入年例解發今督臣議欲裁減相應仍行督撫衙門從長計處奏報至日另行覆請伏乞 聖裁薊州鎮主兵官軍三萬一千六百五十八員名馬六千三百九十九匹京邊主客兵年例銀三十八萬九千四百九十三兩一錢五分九釐撫夷銀一萬五千兩賞軍銀一萬三千八百

兩前件

臣

查得該鎮三客京運并撫夷賞軍共該銀

四十一萬八千二百九十餘兩已屬太多萬曆三年

閔視侍郎汪道昆議題邊餉比舊又增銀一十五萬

三千八百餘兩似涉虛費相應改正今查萬曆二十

一年發過年例銀四十二萬四千八十餘兩比原額

多發銀五千七百九十餘兩查係額外相應停止前

件

臣

等看得薊鎮主客兵馬年例餉銀除二十一年

多發銀數係山東民兵工食銀及該鎮民屯等項俱

比原數缺額應該抵補外所據先經閱臣汪道昆新

增一十五萬三千八百餘兩似涉虛糜議要改正合
行督撫官會查妥當具奏定奪伏乞 聖裁密雲鎮

主兵官軍三萬三千五百六十九員名馬羸一萬三
千一百二十五匹頭客兵官軍一萬八千九百三十
三員名馬羸七千六百四十三匹頭京運主客兵年
例銀三十九萬四千三十七兩一錢九分五釐一毫
前件_臣等查得該鎮原額主客兵銀數已太多萬曆
三年侍郎汪道昆題議邊餉又增銀一十三萬五千
五百二十四兩有零似涉虛費萬曆五年又增銀五

千有奇更屬無謂今查二十一年發過年例銀三十
三萬三千七百七十餘兩是原額銀兩尚用未盡萬
曆三年五年新增銀數通應裁減前件臣等看得密
鎮主客兵馬年例餉銀除萬曆五年增銀五千有奇
係興營中後三衛官軍俸糧布花料豆原在京通倉
庫支領因路遠不便題議改發不議外所據先經閣
臣汪道昆新增銀一十三萬五千五百二十四兩零
似涉虛費議要裁減合行督撫官從長會議具奏定
奪伏乞聖裁永平鎮官軍三萬三千九百一十一

員名馬騾一萬三千五百六匹頭京運年例銀二十
四萬六千八十五兩七分前件臣查得該鎮官軍不
分主客年例數亦贏餘萬曆三年侍郎汪道昆題議
邊餉又增銀八萬四千三百三十餘兩今查二十一
年止發年例銀二十一萬四千六百餘兩是原額年
例尚用未盡則萬曆三年新增銀數相應裁減又查
薊遼總督顧養謙揭帖內稱永平先因倭警添陸兵
三千每名月餉以一兩五錢歲計當費餉銀五萬四
千乃額外之費與李巡撫會議漸銷歲省餉以數萬

計此大臣謀國之忠也相應通行各邊以後地方一
時有事只宜簡練額設兵馬不許輕易增兵前件臣
等看得永鎮主客兵馬年例餉銀除近因倭警加增
銀數委係額外聽督臣酌量漸銷省餉并以後地方
有事止應簡練額設兵馬不許輕易增兵外所擬先
經閣臣汪道昆新增銀八萬四千三百三十餘兩費
出浮糜議要裁減合無督撫官從長查議具奏定奪
伏乞 聖裁昌平鎮主兵官軍一萬九千三十九員
名馬騾五千六百三十五匹頭客兵官軍九千八百

三十六員名馬騾三千一百二匹頭京運主客兵年
例銀一十七萬三千七百九十二兩八錢八分二釐
六毫四絲前件臣查得該鎮主客銀兩通融支給未
見不足萬曆三年侍郎汪道昆題議邊餉又增銀五
萬五千五十餘兩原屬虛費今查二十一年發過主
客兵銀一十三萬二百七十餘兩是原額銀兩尚用
未盡則萬曆二年新增相應裁減前件臣等看得昌
鎮主客兵馬年例餉銀係先經閱臣汪道昆題議酌
定相沿至今所擬增銀五萬三千五十餘兩原非舊

額議要裁減合行督撫官會查妥當具奏定奪伏乞
聖裁易州鎮王兵官軍三萬四千六百九十七員名
馬騾四千七百九十一匹頭客兵調遣不常無定數
京運主客兵年例銀五萬九千兩前件臣查得該鎮
京運舊止五萬九千兩今萬曆二十一年發過銀一
十六萬七千九百八十餘兩比原額多銀一十萬八
千九百有奇蓋因倭警召募兵勇預備料草閱視簡
練總兵遊擊等官各帶標營奇兵往來天津廩給行
糧月費數千餘兩撫臣劉東星題謂軍苦於接應馬

疲於奔走倭未至而民已先病兵未強而費已不貲
誠爲確論自非題議撤回費又不知幾何合無通行
撫鎮諸臣今後偵探必確毋得先事調遣糜費廩糧
去年多發銀數今應停止前件臣等看得易鎮王兵
餉銀先年俱係民運止發客兵銀五萬九千兩萬曆
八年該本部題議將王兵民運銀改解太倉轉發二
十一年多發銀兩皆改解轉發之數似非額外難以
停止合行督撫及餉司殫心查覈務從節縮其防倭
兵馬偵探要確勿得輕易調遣以滋糜費事在督撫

相應通行查議具奏伏乞 聖裁宣府鎮主兵官軍

七萬八千九百一十四員名馬騾駝驢三萬二千九

百四匹頭客兵調遣不常無定數京運主客兵年例

銀三十三萬三千二百二十一兩四錢四分前件查

得萬曆二十一年發過主客兵銀一十四萬八千比

舊省銀一十八萬五千二百二十餘兩臣推其故多

因北虜款貢客兵不行調遣故年例錢糧遂至節省

過半該鎮督撫司道稽察節縮亦與有力焉以後年

例京運似應酌量減發仍乞通行各邊以後能如宣

鎮節省不次優擢則各邊督撫罔不加意轉節而邊
餉不患其不足矣前件臣等看得宣府鎮玉容兵馬
年例除改撥大同鎮銀三萬四千兩每年額發銀二
十九萬六千兩又昌鎮改撥銀三千三百二十五兩
八分長蘆山東二運司轉發銀四萬八千兩共該銀
三十四萬七千三百二十五兩八分今查二十一年
分自太倉發過上半年年例銀一十四萬八千兩其
下半年年例除扣抵該鎮贓罰還官俸糧等項銀四
萬七千九百九十七兩四錢八分六釐外尚該銀一

十五萬一千三百二十七兩五錢九分四釐此因太倉空之所積不穀支費隨查臨德二倉收有粮折銀兩於二十一年十月內具題數動發差官解運支用原非該鎮節省所致合仍行督撫會同管粮衙門細查的確酌議停妥具奏前來以憑覆請伏乞 聖裁大同鎮主兵官軍八萬五千三百一十一員名馬騾驢三萬五千八百七十匹頭客兵調遣不常無定數京運主客兵年例銀四十二萬四千六百三十八兩前件查得萬曆三十三年發過二十九萬六千五

百九十餘兩比舊省銀二萬八千四十餘兩但該鎮
與虜切鄰年例似應照舊前件_臣等看得大同鎮每
年額發主客兵馬年例銀四十五萬六千三百三十八兩
原與太倉考所載數目不同今查二十一年發過太
倉銀二十九萬六千五百九十五兩外扣還原借臨
清倉銀五萬兩共四十四萬六千五百九十五兩止
查扣贓罰事例等項銀四千四十三兩所省不多今
督臣條議該鎮與虜切隣年例似難裁省但值內帑
單匱合行督撫會同管糧衙門加意節省從長酌議

明倫彙編 家範典 卷一百一十一
停當具奏前來以憑覆請伏乞 聖裁山西鎮守兵
官軍五萬一千七百四十六員名馬騾二萬二千六
百六十四匹頭京運主客兵年例銀二十一萬三千三
百兩前件查得萬曆二十一年發過主客兵銀一十
八萬五千一百八十餘兩比舊省銀二萬八千一百
一十餘兩又查得郎中劉允三年積出附餘還官冒
濫屯鹽逋欠之類通計二十餘萬已經戶部題請紀
錄合無通行各邊以後管糧郎中如有實心任事積
餘過多不特紀錄仍破格優處一風示間而所得多

矣然偏頭等關係極衝邊鎮前項年例似應照舊前
件臣等者得山西鎮壬客兵馬年例除改撥大同鎮
銀七千兩每年額發銀二十萬六千三百兩又補河
東鹽課銀一萬六千兩共該銀二十二萬二千三百
兩每年查扣贓罰事例還官俸糧等項多寡不一今
查二十一年發過太倉銀一十八萬一千一百八十
八兩八錢零及查偏頭等處委係極衝年例似應照
舊所據條議各邊要照郎中劉兌節省紀錄超擢合
應依擬行督撫衙門并行各鎮管糧等官加意樽節

以濟時艱仍聽督撫官會議至日以憑覆請伏乞
聖裁延綏鎮主兵官軍三萬六千二百三十員名馬
騾二萬六千五百六十七匹頭客兵調遣不常無定
額京運主客兵年例銀三十六萬七千二百六十五
兩三錢一分前件查得該鎮萬曆七年閱視官軍比
原額減二萬七千六百員名萬曆八年尚書張學顏
題准年例增銀四萬夫餉所以給軍也今軍減糧增
於理通乎又查萬曆二十一年發銀三十一萬二百
六十餘兩比舊省銀五萬七千五十餘兩未稱不足

則前件年例似應止照原額萬曆八年新增似應裁
減前件臣等看得延鎮年例錢糧自萬曆十一年以
後歲有定額向無增減近因西陲多事議召奇兵三
千名因兵未足數兩年內召兵月餉戶七兵三出辦
尚未入額及查二十一年發過銀數比舊省銀五萬
七千五十餘兩因內有就彼改解贓罰等銀扣抵足
額今督臣議要將新增四萬裁減合行該鎮督撫衙
門從長會議應否酌量減省具奏定奪伏乞 聖裁
寧夏鎮主兵官軍二萬五千二百九十一員名家丁

二千四百八十二名馬騾驢一萬三千九百一十九匹頭客兵調遣不常無定額京運主客兵年例銀四萬五千兩前件查得萬曆二十一年發過年例銀二萬六千七百餘兩比額省銀一萬八千三百餘兩但該鎮年例數原不多又當時賊殘破之後尤宜體恤前項年例相應照舊前件臣等看得寧鎮年例錢糧自萬曆七年以來因款貢哀客益主定有常額每年亦有改解扣抵銀數多寡不一以故二十一年發自大倉者止於二萬六千七百餘兩今該鎮時逾殘破

正宜增兵餉以固元氣督臣議將前件年例相應照舊與^臣等所見相同合行該鎮督撫亟行料理兵餉務使兵強餉足兩無虛冒酌議具奏定奪伏乞 聖裁固原鎮官軍五萬九千八百一十三員名馬騾二萬九千五百二十七匹頭京運主客兵年例銀六萬一百三十二兩八錢一分前件查得萬曆二十一年發過年例銀三萬五千八百二十餘兩比舊省銀二萬四千三百餘兩但該鎮年例數原不多似應照舊前件^臣等看得固鎮年例錢糧歲有定額每年俱就

彼改解地租牧租商稅課程等銀扣抵外不足者請
補內帑如二十一年年例除扣足額數外尚剩銀二
萬九千三百餘兩已於二十二年年例內開銷訖其
二十一年發過銀三萬五千八百餘兩因河洮召添
軍馬額外加增固鎮自此比前已增三萬五千八百
餘兩今督臣亦謂該鎮年例似應照舊合行該鎮督
撫於前項新舊餉內共圖節省以充邊費中間如有
可省可減者從長會議具奏定奪伏乞 聖裁甘肅
鎮官軍四萬六千九百一員名馬騾二萬一千六百

八十匹頭京運年例銀五萬一千四百九十七兩八錢一分前件查得該鎮年例舊止五萬一千四百餘兩二十二年發過銀一十五萬四百三十餘兩比舊多發銀九萬八千九百三十餘兩然該鎮遠在天末南番北虜迤鎮不同節年北虜搶番每每假道該鎮前項年例似應酌量減存前件臣等看得甘鎮錢糧定有歲額向無增減至萬曆十三年以後該鎮節議增添軍馬三次加增餉銀共計新舊主客銀一十五萬四百三十餘兩以二十一年發數比舊額故多發

銀九萬八千九百餘兩今督臣條議該鎮遠在天末
南番北虜出沒之地前項年例相應酌量減存合行
該鎮督撫將前項新增舊額餉銀一一從長會議要
見何項冗食當減冗費當省務求積弊盡釐餉無虛
冒仍將應減應存數目會奏定奪伏乞 聖裁天津
三衛原額官士旗軍九千三百九十員名巡捕大馬
一百五十匹本色屯糧料并漕糧八萬二千一百五
石六斗六升二合八抄四撮一圭五粟折色民運并
屯糧等銀七千二百九十七兩九錢五分六釐三毫

八絲四忽七微三沙三塵九埃前件查得天津三衛
原有兵九千三百九十員名爲海防而設亦有額派
糧料後因各軍坐糜糧料內簡五千七百赴薊鎮修
守萬曆二十年因倭警新募海防兵三千名月餉人
一兩力士五百名月餉人一兩五錢去歲不及一年
費太倉銀五萬九千九百五十餘兩皆額外之費也
然已募不可遽散相應將新軍撥補三衛逃亡給以
額餉力士更番休歇遇警按籍調取是亦銷兵省餉
之策也三衛改赴薊鎮官軍仍應撤回前件臣等看

得天津三衛原有額兵額糧後因坐糜糧餉以故改
赴薊鎮修守適因倭警天津地方復行召募官兵力
士歲費餉銀數多今議將前項新募兵士撥補天津
三衛逃亡名數給以額餉力士更番休歇遇警調取
將三衛先年改赴薊鎮官軍五千七百名仍行撤回
本衛防守誠得安兵裕國之策但今倭報未寧力士
應否更番薊鎮官軍撤回天津果否便益仍聽該鎮
督撫衙門從長酌議停妥另行奏請定奪伏乞

聖裁

恭效愚忠披陳時政之要疏

楊俊民

戶部尚書

萬曆二十三年二月

案查萬曆二十二年六月內該總督倉場都御史褚
鈇題稱邊餉新增漸多太倉供億難繼備開各鎮兵
馬錢糧新舊數目乞要嚴加查減歲可省銀七十餘
萬該本部覆議前項邊餉應減應留事在闔外遞難
逞斷題奉欽依通行九邊督餉司查議回奏以憑覆
請去後止據延綏寧夏巡撫官李春元周光鎬回奏
西陲多事近議添兵加餉原額難以頓減又據宣大

總督蕭大亨奏稱大同鎮兵馬錢糧應照經制定規
遵守餘尚未見回奏今該前因通查案呈到部爲照
天地生財有限國家經費無窮卽今內帑單詘歲出
浮於成額閭閻勸民力竭於科征公私兼窘莫有
甚於此時臣等職縮會儲蚤夜思維計無所出顧近
來各邊鎮不思額內清查稍裨實用且嘗額外加添
偏示寬容今日請增兵明日請增餉却之勢固不可
從之力存不能權宜措處全非經久之策輔臣陳於
陛輸忠體國銳志籌邊放歷朝經制之規慨列鎮虛

耗之費覈實清查披陳殆盡至欲重餉司事權庶便
責成尤是人存政舉相應依擬覆請恭候命下本部
移咨各邊總督撫按衙門及劄各鎮管糧司官及轉
行分巡兵備等官各將本鎮兵馬錢糧逐項核查要
見原額兵馬糧草各計若干某年加增若干某年議
減若干其減存錢糧曾否抵充部發年例今當查議
某項係舊規某項以新增應該酌減并照總督褚鈇
原題一併查明各另回奏固不當驟減以消軍儲亦
不得沿襲以糜國用大都各邊年例均有浮額向來

上下因循未嘗着實綜覈果肯縷折條分逐漸減省
止照嘉靖十八年年請發例銀定爲額數固不敢望
復 祖宗朝舊制也至於督餉部臣吏部會同本部
簡蕪潔任事者量兼憲秩勅內添載清理軍馬實數
稽覈糧料虛冒令其便宜酌裁仍令與按臣勘驗出
納務使屯政修舉鹽法疏通民運無拖遺之虞召買
釐截攬之弊給放軍糧更要總理中間逃故日久未
曾開除及暗伏出邊鬼名冒給是皆將領藉以侵匿
做做成風牢不可破卽據實參究以肅法紀差滿回

部公同吏部考察錄過旌勤以示懲勸再照各邊年
例自四十餘萬而增至二百八十餘萬數已極矣及
薊密等鎮續又加餉四十餘萬今又增銀五萬六千
有餘陝西各鎮自劉哱叛後歲增一十九萬六千有
餘遼鎮添募標兵近又增銀一萬六千餘兩當此匱
乏之秋可不亟爲撙節更求請益此豈安社稷者之
計乎輔臣所云金錢銖兩未必盡爲邊用糧芻粒米
未必盡充軍實真是探本之論臣等竊思錢糧帛破
全在軍馬逃亡及征調之間調征則以少開多逃亡

則隱匿不報冒充私囊無所忌憚司道撫按欲行開
點輒便覓人頂替縱使聰察難以詰究若近日劉挺
在遼左侵尅無筭可槩見矣更乞 皇上申飭督撫
八道等官嚴示將領千把總等官將軍丁逃故者按
日扣除新補者照日報收馬匹倒失者隨卽報官新
買者照日收冊至於征調軍馬逐一驗查無容虛冒
如管隊千把總及將領朦朧隱蔽者聽部道官叅呈
部道市恩容縱聽總督撫按題叅本部覆請重治臣
等近聞山人墨客星相俳優往往遨遊塞徼間攜重

資以歸莫非將弁朕削兵根填實私竇與輔臣今日
所奏毫毫不爽此更當亟行禁革者統俟 聖明裁
定勅下 臣等遵奉施行

欽奉聖諭急勅會議宣鎮錢糧以救危急以安

重鎮疏

連

標

巡撫宣府副都御史
萬曆三十六年五月

萬曆三十六年四月初四日准總督軍門咨准兵部
咨本年三月二十五日該司禮監太監成敬等於文
華門傳奉 聖諭朕雖靜攝宮中未嘗不念周天下

其於柔遠安邇詰戎振武之事尤惓惓焉欽此欽遵
轉咨到 臣准此除各項邊務通行各道將領見在舉
行 臣一奉 聖諭仰見我 皇上雖靜攝深宮其留

神疆圍一至於此臣邊吏也敢不祇承上命以求稱

塞請先言宜鎮積苦并時勢危急以乞恩於陛下

夫宣府拱護陵京捍禦夷虜爲朝廷肩背重地人人

知之矣國初額設兵馬錢糧黎然具備相沿二百年

來雖虜人順逆不常然戰守機宜自足調度乃今日

有大謬不然者臣叨承任使鎮撫地方於昨歲六月

入境首詢地方急務僉曰錢糧缺乏至極臣伏思之

邊臣大計不過曰城堡之當修也兵馬之當練也器

械之當整也數者之貴非錢糧莫能辦錢糧缺乏數

事難理卽開具節年京民兩運完欠數目乞勅九卿
科道會議處置至今未奉明旨今本鎮事勢危如累
卵臣方蒿目腐心旁惶莫措近接邸報戶部尙書趙
世卿一本大都謂九邊年來增兵增餉大逾常額乞
勅會議等因臣不覺仰天竊嘆宣鎮從此得見天日
也夫八邊兵餉有無加增事在各鎮臣不得與知其
本鎮兵餉冊籍所開載者臣謹一一爲臣陛下言之
竊惟臣於萬曆十八年奉差巡按宣大查核宣府兵
馬之數共十一萬有餘于時款貢日久主客兵銀積

至一百萬有奇此正兵部蕭尚書總督時今可問而知也當其時帑庾充盈有備無患隱然虎豹在山之勢安見錢糧之不足日者旣蒙聖諭諄切又見戶部會議之請臣卽行三道稽查近日兵馬總數暨錢糧完欠數目會呈到臣始知兵馬之數與臣巡按時大畧相同其錢糧之拖欠令大有警駭而不敢言者在十年以前姑不必論自萬曆二十七年以至於今扣去本鎮經制額內主客兵銀一十三萬兩又將本鎮在庫銀借發山大二鎮一十萬九千一百有奇抵作

戶部應發兩鎮年例未經補還又扣留山東長蘆二
運司應解本鎮鹽課三十三萬九千七百有奇近經
題奉欽依前銀陸續發邊以爲修工口糧鹽菜之用
候領數月止發一萬見今千萬軍夫在邊興工枵腹
從役胥起怨咨臣恐致有他釁行牌曉諭暫且歇工
又扣留昌鎮年例改撥本鎮榆林土木二驛軍士馬
騾糧草布花銀一萬九千四百有奇節年省直民運
拖欠八十七萬七千三百有奇戶部拖欠京運五十
七萬一千二百有奇共該銀一百四十六萬七千九

百有奇年月歷歷可紀未差官與已差官未到暨到而發不及數者咨文俱有可查臣謹造黃冊一本上呈聖覽竝送在朝大小臣工以上欠數係額之內乎額之外乎在山西司郎中有底冊管庫主事有簿籍可考鏡也夫本鎮額餉歲不過一百餘萬數年之間欠至此數以致庫藏若掃倉廩半空是繫縛邊臣之手足四體不能展布也將何所控訴哉雖欲修築城堡操練兵馬整飭器械以答陛下之責成者何所借資哉目今宣鎮兵馬三月無芻餉人多餓死逃亡

馬多倒損骨立且日夜憂惶計無所出餉司郎中黃道亨終日兀坐無事出納借班價銀二萬五千兩借市賞銀七萬九千六百餘兩多方那湊皆不得已爲權宜之計以應千萬軍兵擁門泣訴者指日秋初開市正項當支作何抵補在彼犬羊之性最難支吾不知當事者又何以應之是宣鎮之憂不專在我軍而又在夷虜也前開數款多於戶部相關臣非不揣疎遠邊臣敢與廟堂大僚較是非論屈直第職掌所在一鎮之司命遠人之叛服陵京之安危係焉臣亦何

敢避觸犯之嫌自處緘默甘負任使以取罪於他日也惟我皇上念周天下一聞此等景象必有惻然于衷者懇乞俯軫肩背重地亟當拯救勅下九鄉科道從實勘議速將節年未發本鎮年例京民三運竝鹽課借貸扣留銀兩照數給發催解庶乎借用別項得以補還久餓兵馬得以速飽由此修我邊堡練我兵馬整我器械以盡微臣封疆之職慰陛下振刷之望端在是矣地方幸甚臣愚幸甚